



Kabarett „Sachsenmeyer & Co.“  
09224 Chemnitz  
Feenweg 11

Hauptspielstätte:  
Kabarett-Kiste (im Hedwigshof)  
An der Markthalle 8  
09111 Chemnitz

Bestell-Telefon: 0371 - 694 77 11  
[www.sachsenmeyer-kabarett.de](http://www.sachsenmeyer-kabarett.de)  
e-Mail: sachsenmeyer@t-online.de

**31. Kalenderwoche – ab 2. August 2009**

## Dor gommunisdische Wiehrus

Nu dud de Schweinegribbe doch langsam ooch bei uns massief zuschlachn. De Uhrlaubor dähn dähn Wiehrus midbring ausm Ausland. Zum Gligg dud abor an dähm Wiehrus keenor schdärm, wennor ansonsdn gesund is. Abor irschendwie isses drozdähm bedenklisch – widdor dud was off uns hier zurolln, was mir gahr nisch gerufn hamm. Un es is ja nisch de erschde Seusche, die vorsuchn dud, uns hier zu iborrolln. Isch hab fasd das Gefiehl, von alle Seidn dun se vorsuchn, uns hier irschendwas offn Hals zu häng, wo mir dran gnabborn missn. Wenn isch da ma bloß an dähn Rindorwahn odor de Vochlgribbe erinnorn darf! Odor de Finanzgriese! Das dud immor von außn komm. Dor Rindorwahn aus England, de Schweinegribbe aus Mexigo, de Vochlgribbe war aus Schiena un de Finanzgriese aus Amähriga.

Warum dun mir uns da nisch ma revangschiern? Mir kenndn doch ooch ma was Beeses in de Weld sedzn, wodran dann die annorn zu gnabborn ham dädnd?

Ohgeeh – mir hamm de ledzdn zwee Weldgriesche in de Weld gesedzd. Wobei – die zwee Griesche hammse uns eischendlich in dor Weld einischormaßn vorziehn. Un dann... - dor Gommunismus dud von eim Deudschn hährschedamm! Das kennde sein! Villeischd is das jedzde mid dor Schweinegribbe un dähm annorn allm sozusachn de Reduhrgudsche daderfiehr?

Als Schdrafe fiehr dähn Gommunismus! Weil mir dähn Gommunismus ja nisch bloß eenfach in de Weld gesedzd hamm – dähn gommunisdichn Wiehrus! – nee, mir hamm dähn ja ooch noch selbor ausbrobierd. Dähr had in uns gebrieded! Mir ham dähm Nahrung gegähm. Also, mir hier im Osdn! Un mir sinn nisch droffgegang.

Nascha, un wenn sisch dähr gommunisdische Wiehrus noch e bißl muddiern däde... - das is ja bei alle Wiehrusse so, dass die eene Neischung hamm, dass sie sich muddiern dun... - dscha, währ weeiß, wie sisch dann so e muddierdor Wiehrus auswirkn däde?

Bei dor Schweinegribbe hamm se ja Angsd, dass sich dähr Wiehrus so muddiern dud, dass dann alle dran schdärm dun, die ne grischn. Abor kenn sisch Wiehrusse nisch ooch ma zum Guhdn hin muddiern? Warum denne nisch?

Un womeeschlich kennde mor ja so een Wiehrus ooch beeinflussn – so mid moderne wissnschafdliche Medhodn? Odor Hibbnohse? Was weeiß isch! Am Ende is dann so e Schweinegribbnwiehrus villeischd guhd geeschn Schnubbn? Odor beim gommunisdischn Wiehrus...? Am Ende däde dähr womeeschlich geeschn de Benkor un annre Finanzhaie guhd sein? Däde die off de Breddor schmeddorn? Nee, isch gloobe, als Rache fiehr dähn Gommunismus dun die uns die ganzn Seuschn nisch offn Hals schiggn. Mir missn als Deudsche noch was annersch fabrizierd hamm, wasse uns ieblnem! Ach, hamm mir nisch dähn Fernsähor erfundn?

**Eduard Sachsenmeyer**